

四庫全書

子部

欽定四庫全書

子部

古今姓氏書辨證卷五
六

詳校官中書臣沈鳳輝

侍讀臣孫球覆勘

謄錄監生臣雷琳

謄錄監生臣汪麟

欽定四庫全書

古今姓氏書辨證卷五

宋

鄧名世撰

十三佳

媯

瓜音

女媯之後

柴

出自姜姓齊卿高恭仲僕裔孫柴字子羔為孔子弟子後世以柴為氏邢州龍岡柴氏有守禮者生榮其

姊適周太祖為聖穆皇后太祖養榮為子是為周世宗皇帝生恭帝宗訓紀王希謹世宗之弟貴虢州防禦使生肅閣門祗候肅曾孫之子詠以比部員外郎封崇義公生右侍禁若訥亦封禁義公晉州族人東頭供奉官延可生用政用政生右侍禁元亨元亨生供備庫副使愈愈生南唐江州刺史克宏晉州臨汾柴氏紹字嗣昌唐鎮軍大將軍譙襄公尚高祖平陽公主夫妻佐義師有功生右屯衛將軍哲威衛州刺

史襄陽公令武

娃

出纂文要

鮭陽

後漢牟融代鮭陽鴻為大司農鴻字孟宗注曰鮭陽
姓也

十四皆

懷

左傳周成王以商民大姓封諸侯以懷姓九宗賜唐
叔姓書曰懷姓出古帝無懷氏之後謹按顧雍傳有
尚書郎懷叙望出河南

淮

出姓苑

十五灰

回

出自妘姓祝融孫吳回之後以王父字為氏

槐

姓苑音懷出商帝槐之後

枚

梅音

漢弘農都尉枚乘生臯王莽時有越雋太守枚根今望出淮陰

梅

汝南梅氏出自子姓梅伯為紂所醢武王封伯元孫黃梅號曰忠侯以梅為氏世居楚鄭間漢將軍梅銅

六代孫喜始居汝南又南昌尉梅福字子真

雷

出自古諸侯萬雷氏之後以國為氏後單姓雷黃帝
相雷公淮南王郎中雷被後漢南郡澠山蠻雷遷晉
豫章人雷煥為豐城令後徙馮翊南朝處士雷次宗
後燕陽翟公雷羣前秦將雷惡地姚秦將軍雷竒唐
著作郎雷穎左庶子雷咸

悝

出姓苑

顏

出自左傳周大夫顏叔之後姓解曰史記有顏當誤矣顏當姓韓封弓高侯故韓王太子也

崔

出自姜姓齊丁公伋嫡子季子遜國叔乙食采於崔遂以為氏濟南東朝陽縣西北崔氏城是也季子生穆伯穆伯生沃沃生野八世孫天生杼為齊正卿謚

武子生三子子成子強皆為慶封所殺子明奔魯生
良十五世孫意如為秦大夫封東萊侯二子業仲牟
業字伯基漢東萊侯居清河東武城生太常信侯昱
昱生襄國太守穆侯紹紹生光祿勳嗣侯雅雅生揚
州刺史忠忠生散騎常侍秦秦字世榮始居歙縣二
子恪景恪丞相司直生郡功曹因七子雙郎寓金虎
藩固雙為東祖郎為西祖寓為南祖亦號中祖唐人
姓書曰漢司隸清河崔忠有三子長曰秦子孫居歙

縣為西祖今烏水崔光其後也次曰恪恪弟因因子

雙居武城為東祖今僕射休兄弟及青州崔亮其後

也季曰寓號中祖司徒浩武陵公寬及許州崔暹其

後也寓四世孫琳字德孺

案唐世系表琳作林孺作儒

魏司空安

陽孝侯曾孫悅前趙司徒右長史關內侯三子渾潛

湛湛生顓後魏平東府諮議參軍生蔚自宋奔後魏

為郢州刺史居滎陽號鄭州崔氏生暹幼字季陽

後魏永昌郡守五子彥珍景茂彥章彥穆彥昇彥穆

後周少司徒東郡公四子君綽君肅君胄

案唐世系表胄作宙

君瞻君胄生千里千里生元綜相唐武后蔚少子或

幼弟也居鄆陵為許州鄆陵房或孫隋本州主簿子

今生利州刺史樞樞生陝州刺史義直義直生知悌

知久知儉知讓知溫知遜知溫相唐高宗生泰之諤

之泰之初以職方郎中預平二張官至左丞黃門侍

郎工部尚書諤之以商州司馬預平韋后位少府監

趙國公南祖崔氏泰少子景字子成淮陽太守生璉

字子建

案唐世系表璉作捷此璉當誤

璉生破虜將軍權權生諫議

大夫濟字元先亦稱南祖濟生湫字道初湫生安定

侯融字子長生中書令溫字道和溫生魏常山太守就

字伯玄就生上谷太守公安公安生晉大司徒關內

侯岳字元嵩岳生後趙尚書右僕射牧字伯蘭牧生

後趙征東大將軍蔭字道崇蔭生聊城令怡字少業

怡生宋樂陵太守曠隨慕容德渡河居齊郡烏水號

烏水房生清河太守某二子靈延靈茂靈茂宋庫部

郎中居全節生稚寶後魏祠部郎中稚寶生遠

案唐世系

表遠字景通北齊三公郎中生司徒長史德仁德仁生君實此脫

周司徒長史德仁

生許州治中君實君實生宜君丞縣解縣解生融字

文成清河郡公融生翹唐禮部尚書清河郡公翹生

渠州刺史異異生能字子才嶺南節度使清河郡公

能弟從字子又淮南節度清河公

案唐世系表從清河縣伯

生慎

由字敬止相宣宗慎由生肩字垂休相昭宗謂之崔

四公慎由弟安潛字進之太子太傅貞孝公皆有傳

伯基八世孫密密二子霸琰霸曾孫遵後燕太常卿

生撫宋汝南太守撫玄孫文仲生登相武后

宋唐世系表文

仲之凡文舉生登相武后

琰字季圭魏尚書生諒字士文生遇遇

生瑜瑜生逞字叔祖逞生禕禕四世孫溉字

宋唐世系表溉

生義玄作字誤

義玄唐御史大夫清丘貞公義玄生神基相

武后神慶司刑卿魏縣子神慶生琳太子太保清河

大房逞少子諱宋青冀二州刺史生靈和宋員外散

騎常侍生後魏贈清河太守宗伯生休寅休號大房

休字惠盛後魏殿中尚書文正公五子稜仲文叔文

子忠子表

案唐世系表稜作懷叔文作叔
仁子忠作子侃子表作子聿

仲文北齊

光祿大夫生隋內史舍人儻儻

案唐世系表儻作僬

生虔虔生

益字元友益生昕暉暉渭州刺史生誠誠孫龜從字

元吉相宣宗清河小房寅字恭禮

案唐世系表恭禮作敬禮

仕後

魏太子舍人樂安郡守生長

案唐世系表表作長謙

給事中青州

刺史生子令公華子令高唐令公華生復州刺史大

質大質生玄覽玄弼玄機玄泰玄覽曾孫湛字湛然

生虔朝虔大理司直朝字懿忠鄭懷二州刺史孫羣
字敦詩相憲宗玄弼延州刺史生弘默道默道郁道
郁生醴泉令綜綜生太子中允佶佶生誣陞陞御史
中丞八子邠字處仁太常卿謚文簡生吏部郎中璜
鄴司農卿生吏部尚書瓘字汝器鄆字廣略浙西觀
察使謚德生瑀瑀瑾皆觀察使璆字致美相黃巢邠
大理卿無子邠無官生瓚字錫勳鄴右金吾將軍生
琢字子文瑄字右玉琛字真器珮字聲諫琪字廷秀

鄆相宣宗卨字德璋青州房琰生欽欽生京京生瓊

案唐世系表京孫瓊

慕容垂車騎屬生輯宋泰山太守徙居青

州號青州房輯生修之修之生宋尚書郎元孫元孫

生亮後魏僕射侍中正烈公亮生士泰征蠻別將樂

陵文肅公生肇師北齊中書侍郎襄城男肇師孫道

淹生方騫萬年主簿臨洛子方騫生正固武功主簿

正固生景暉大理評事景暉生圓相肅宗 博陵安

平崔氏仲牟為漢汶陽侯始居博陵安平生融融生

石生廓字少通即四皓夏黃公也廓生寂寂生欽

欽生朝漢侍御史生舒漢四郡太守二子發篆篆郡

文學王莽召不起生毅毅生駟字亭伯長岑長生三

子盤瑗寔瑗字子玉寔字子真生皓曾孫洪盤生烈

後漢太尉生鈞字州平西河太守十世孫昂生仁師

相唐太宗四子揣擢携

案唐世系表携作攝

挹挹戶部尚書生

湜字澄澗相中宗年二十九為中書令以罪誅凡液

弟滌博陵大房駟少子寔字子真後漢尚書生皓皓

生質質生贊贊生洪字良夫晉大司農生廓廓生端

端生懿字世茂五子連琨格邈殊五房又燕主賜王

氏生怡豹侶同為一房因號六房崔氏連

姓纂作遺

字景

遇鉅鹿令號大房生郡功曹綽二子標鑿標字格祖

案唐世系表作洛祖

行博陵太守生後魏鎮南長史廣字仲慶

生元猷元猷生常字文業後魏中書侍郎當生伯謙

字士遜鴻臚卿謚懿伯謙生淵字孝源青冀二州司

馬生綜字君維長安令綜生慎字行謹胡蘇令慎生

玄暉相中宗五王中一人也玄暉生璆璩璿璠璿禮
部侍郎襲博陵公生震渙渙門下侍郎生縱御史大
夫常山忠公縱生元方沔州刺史元方生碣字東標
綜少子祕書監行功生旻景昱晷晷暈晨昊晷曾孫
損字至無相德宗鑒字神具後魏東徐州刺史安平
康侯三子含秉德習秉德驃騎大將軍謚靖穆子忻
君哲仲哲仲哲後魏司徒行參軍安平縣男生長瑜
仲琰長瑜子樞等九人號崔氏九龍仲琰生君昭君

昭生播播生玄亮玄亮生無縱無縱生望之釋之藏
之渾之渾之生璪尚書右丞璪生元畧元受元式元
儒元畧義成軍節度使生鉉字台碩相武宗宣宗鉉
生沆字內融相僖宗元受直史館高陵尉元式相宣
宗生鎮劔鉅第二房琨字景龍饒陽令行本郡太守
二子經鬱經生辨字神通後魏武陽太守饒陽侯謚
恭二子逸楷楷字季則後魏殷州刺史後將軍生士
元士謙士順士元周江陵總管武康郡公

案唐世系
表士謙周

江陵總管武康郡公生曠

生隋沂州刺史曠曠生隴州刺史確確

生駙馬都尉博陵縣男恭禮恭禮生去惑興宗興宗

饒州長史生臨渙丞雋雋生懿懿生同州刺史頰頰

生瑄瑄瑄

案唐世系表瑄作瑄

珙璵璵球瑄字從律山南東道

節度使瑄刑部尚書珙相武宗璵字朗士河東節度

使璵常州刺史士謙弟說後周大將軍安平壯公生

弘度弘昇弘峻峻隋趙王府長史生洛令儼儼生暄

皓暄暄徐州司馬其孫儀甫嬰甫皓安平公生監察

御史渾及太子賓客清河孝公沔字若冲沔生成甫
祐甫祐甫字貽孫相德宗除清吏八百員人不以為
私者無子以廬江令嬰甫子植為後植字公修相穆
宗嘗請以無逸為元龜然為相無狀鬱後魏濮陽太
守生挺字雙根後魏司徒泰昌縣子挺生孝芬字恭
梓太常卿太昌縣公孝芬生猷字宣猷隋大將軍汲
郡胡公猷生仲方字文齊宋唐世系表
文齊作不齊信都太守固
安縣伯仲方生燾字大德鳳泉令石城縣男燾生安上

字敦禮相高宗二子修業守業修業太子通事舍人
守業刑部侍郎孝芬弟孝暉後魏趙郡太守謚簡生
昂字懷遠北齊祠部尚書昂曾孫紹睿武邑令生白
水尉項項生汾西令昇之昇之生造字玄宰相德宗
第三房格二子蕃穎蕃生天護穎八世孫不疑左補
闕天護生穆纂融纂字叔則後魏冀州刺史生猷北
齊散騎常侍猷生誠及世立世立隋大理少卿安平
男生祁陽令抗抗生潛漪汲漪河間丞生日用相唐

中睿玄二宗汲長安丞生日知字子駿潞州長史中
山襄公日用生宗之右司郎中元和姓纂清河東武
城後有齊郡高密藍田三崔氏門戶魏大和中定清
河崔為山東五姓甲門又太和姓族品滎陽四姓鄭
皇甫崔毛又魏舊定清河崔為第一甲門釋曇剛類
例曰崔懷兄弟并青州崔肇次盧鄭之後崔陵及青
州崔亮次之崔隆宗為後舊定博陵崔為次甲門曇
剛類例曰先崔昂次崔季舒及齊州崔光李公恠類

例則首崔楷後季舒又舊甲乙門者崔楷長瑜為先子樞季舒次之舊博陵崔在乙門者曇剛以崔暹入

第五件

按件字疑門字之誤

李公掩則首崔敬寬次崔暹唐魏

鄭公定天下諸州姓譜以崔張房何傅靳為貝州清

河郡六姓又後燕上黨太守崔敦博陵人有五子凡

裔三子弟休二子各專一業時號敦五子為五舍并

裔休等子為崔氏十門仕宦北齊崔暹崔昂崔季舒並

為高祖任使時謂三崔唐崔義玄神基琳三世為蒲

州刺史又神基神慶神福兄弟三人相繼為三庶子
神慶子珪又為之開元中崔琳與弟珪瑤三人同時
列戟號三戟崔家天后時有二崔融俱為郎官故以

文章目翹父

按崔融史稱其為文典麗故以文章目之翹融之子也

而以門戶

目其一人蓋時不能辯也賜姓西魏後周賜汲郡公
崔宣猷武城公崔士謙並姓宇文氏安平公崔詵亦
然宣猷曾孫敦士謙孫確詵玄孫河並復本姓

裴

出自顓帝裔孫大業生女華女華生大費大費生臯

陶臯陶生伯益賜姓嬴氏生大廉大廉五世孫曰仲

衍

案史記大業取少典之子曰女華生大費是為伯翳生大廉大廉之玄孫仲衍此以女華為大業子

而以大費伯益為兩人俱誤又左傳高陽氏有才子八人庭堅即臯陶字也則臯陶為顓頊子此則為大

費子於傳無徵

仲衍四世孫曰軒軒生湑湑生飛廉飛廉生

惡來惡來生女防女防生旁臯旁臯生太几太几生

大駱大駱生非子周孝王使養馬汧渭之間以馬蕃

息封之於秦為附庸使續嬴氏號曰秦嬴非子之支

孫封豈鄉因以為氏今聞喜豈城是也六世孫陵當
周僖王之世封為解邑君乃去邑從衣為裴裴衣長
貌一云晉平公封顓帝之孫鍼於周川之裴中號裴
君疑不可辨陵裔孫蓋漢水衡都尉侍中九世孫燉
煌太守遵自雲中從光武平隴蜀徙居河東安邑安
順之際徙聞喜曾孫曠并州刺史度遼將軍子茂字
巨光靈帝時歷郡守尚書率諸將討李傕有功封陽
吉平侯三子潛徽輯徽字文秀魏冀州刺史蘭陵武

公以其子孫多仕西涼者故號西眷裴四子黎康楷

綽黎字伯宗一名演游擊將軍秘書監二子粹苞粹

晉武威太守二子詵恆詵太常卿避地涼州及苻堅

克河西復還解縣生劭劭生和鍾

案唐世系表劭生和和生鍾

鍾

生景惠後魏別駕景惠生會他會生韜韜生後周司

木大夫融融生儀同大將軍孝瑜居蒲州桑泉生寂

字立真

案唐書本傳寂字真玄

相唐高祖司空尚書左僕射寂

生律師駙馬都尉河東公律師生承先殿中監他字

元化後魏中軍將軍荊州刺史生讓之訥之謁之訥
之字士言北齊中書舍人始居聞喜生揆世矩通世
矩字弘大相唐高祖所謂其姦足以亡隋其智足以
佐唐者生宣機奉高善昌粹子暉生瑾自河西歸秦
梓居解縣洗馬川號洗馬裴任前秦為大鴻臚二子
天恩天壽天恩後魏武都太守生安祖祖思祖愛安
祖安邑令生思濟思濟生宗賢宗賢生措

案唐世系
表措作錯

措生二子同機機生談相唐中宗祖愛生鴻臚卿義同

義同生仁素仁素生大同大同生炎字子隆相中宗

炎生懿彥先伯先黎第二子苞生三子軫丕彬軫生

嗣西涼武都太守三子邕喬策邕渡江居襄陽生順

宗順宗三子叔寶叔業令寶叔業齊南兗州刺史初

歸北號南來吳裴事後魏蘭陵郡公謚忠武子禧之

芬之蘭之英之藹之禧之字文聽北齊隋王左常侍

生正

案唐世系表蘭之曾孫
正生春此作禧之生正

正生南鄭鄴令春字歸

厚春生同節守真九思守真字方中邠寧二州刺史

生子餘巨卿耀卿僑卿幼卿春卿昱子餘給事中謚
孝耀卿字渙之相唐明皇僑卿起居卽生尚舍直長
沂沂孫戶部員外郎伯言生邕管經畧使行立令寶
二子彥先彥遠彥遠生鑿鑿生獻隋扶州刺史臨汾
公二子義山羅義山生行本相武后行本兄知節生
倩倩生士淹禮部尚書絳郡公明皇狩蜀時馬上與
論宰相者生通字文玄檢校禮部尚書羅隋魏郡丞
生公緝公繹公績公緝祠部郎中生瑾之倉部郎中

瑾之生淮太子賓客正平懿公公繹邢州長史生表

州長史無悔無悔八子韋

案唐世系表韋作卓

坦昌寬歆恂晏

京寬禮部尚書生諲字士明東都副留守京汝州別

駕生胄字遐叔檢校兵部尚書嗣中子裔晉太尉宋

公版諂議參軍并州別駕號中眷裴三子萬虎雙虎

三虎萬虎生保歡保歡生良字元賓後魏大府卿良

生隋太中大夫子通子通兄弟八人皆為名孝詔表

門閭世謂義門裴氏雙虎後魏河東太守生惠秀惠

秀生梁兵部尚書嵩壽嵩壽生後周光汾二州刺史

琅琊公伯鳳伯鳳生定高德超定高襲琅琊郡公德

超寧州刺史生思簡思諒思諒靈武大總管河東郡

公生行儉

案張說裴行儉神道碑行儉乃仁基子此作思諒誤張九齡裴光庭碑亦祖仁基

唐襄武道大總管聞喜憲公其子光庭字連城相明

皇光庭生積

案張九齡裴光庭碑積作積

司勳員外郎正平縣子

積生倩字容卿度支郎中正平節男倩生均字君齊

左僕射平章事均生鈇鳳翔府參軍三虎後魏義陽

太守三子文德高仁挑弓高仁曾孫耀之高陽太守
生武陵令知道知道生中書舍人義弘義弘生蜷字
翁喜杭州刺史河東縣男生遵裕遵業遵慶遵慶字
少良相代宗生會向向字僚仁吏部尚書生寅字子
恭御火大夫寅生樞字化聖相昭宗苞第三子丕丕
孫涼州刺史定宗生後魏冠軍將軍訛訛生太原太守
遼遼生正平太守郾隴西郡公纂纂四子舒嗣秀詢
舒後周車騎將軍元氏公生昂昂生玄運濮州刺史

玄運生李友司門郎中生武武曾孫訢訢生總太常
博士總曾孫安期汾州司馬生後已循已修已後已
濟源令生郁邠鄆鄆部循已右衛大將軍生耶邠鄆
郢修已左贊善大夫生郢邠鄆汾州別駕生福建觀
察使又及虔州刺史稷又生坦字知進相唐僖宗生
大理丞儲案唐世系表
儲係稷子儲生贄字恭臣相昭宗東眷
裴出自茂第三子輯號東眷生穎司隸校尉穎生武
字文應晉大將軍玄菟太守永嘉末避地平州生開

開字景舒仕慕容氏太常卿祭酒三子原成範範字
仁則河南太守四子韜冲湛綏冲字泰寧後秦并州
刺史夷陵子五子道子道護道大道會道賜道子字
復泰本州別駕從劉裕入關事魏南梁州刺史義昌
順伯三子德歡思立輔立德歡一名度豫鄭廣坊四
州刺史謚康二子澄禮澄字靜慮後魏汾州刺史生
景漢尼尼字景尼後周御正大夫三子之隱師民之
爽之爽生希仁希淳

案唐世系表淳作淳

希莊希莊陳州刺史

生抗抗生宣宣生肅字中明浙東觀察使三子儔休
俅儔字次之江西觀察使休字公美相宣宗俅字冠
儀諫議大夫生澈字深源相僖宗道護二子次愛祖
念祖念生弘陔後魏聞喜公生鴻琳易郡太守生客
兒後魏長平郡丞弟鴻智襄州刺史高邑侯生師道
師道生懷儉監察御史玄孫昱高陵令生均相憲宗
獎諫官使盡忠者師道之弟師武案唐世系表懷
感係師義子生
懷感澧州刺史曾孫冕字章甫相代宗懷感五子其

少子魯師生知機知機二子鉉寘寘生有隣濮陽令

有隣生淑

案唐書
作淑

澠池丞淑生度字中立歷相唐憲

穆敬文四宗位司空晉國公用不用嘗為天下重輕
生譔詡諗調識誠讓諗識有傳唐疏勒國王姓裴氏
自號阿摩支

栝

師古曰栝音希回反姓栝名育姓書舊無此氏今增

入

欽定四庫全書

卷五

古今姓氏書辯證卷五考證

第八頁前三行 太子中允句原本作大理主簿按唐世系表估為太子中允證為大理主簿今據改正

第九頁前一行崔廓即四皓夏黃公句 按新唐書宰

相世系表載漢汶陽侯崔中年生融融生石石生廓不言廓即夏黃公又考前漢書張良傳夏黃公在漢初年已八十餘此云仲牟曾孫時代不合恐誤

第九頁前三行崔駟為長岑長句 按長岑縣名崔駟

為長岑長乃縣令之職原本作生長岑長三子盤瑗
寔是以長岑為駟子名而盤瑗寔又為長之子其謚
甚矣今據後漢書改正

欽定四庫全書

古今姓氏書辯證卷六

宋 鄧名世 撰

十六哈

來

漢光祿大夫來漢從楊僕擊南越孫仲諫議大夫生
中郎將歛字君叔世稱天下義士歛生褒褒生稜稜
生執金吾歷字伯珍歷生中郎將定定孫司空豔字
季德生敏字恭達蜀執慎將軍七世孫翦始徙江都

崩生繪繪生護兒隋左翊衛將軍榮國公二子恒濟
皆相唐高宗世稱護兒作相是也恒生虞部郎中景
業濟諫傳位武后事知名生潤州刺史恭業中書舍
人慶遠後漢又有并州刺史來機唐又有酷吏來俊
臣寶歷時來擇字無擇應賢良方正科著秣陵子集
一卷

邾

出自子姓諸侯所食之邑春秋時鄭之時邾是也

楷

姓苑云楷音扶菜切

台

姓苑云望出武功

郤

扶風縣名出自姬姓后稷為堯大司農以功封郤支
孫氏焉

欽

出自高陽氏才子八愷一曰頽歆後以字為氏

哀

後漢更始傳王莽使國將哀章守洛陽注曰風俗通
哀姓出自魯哀公之後因謚以為姓又後漢有故掖
庭人哀置嫁為男子章初妻宋有哀道訓居南康贛

縣

菜

出自古諸侯菜國之後為氏左傳菜子國為齊所滅

因氏焉誤矣

十七真

真

董賢使太醫令真欽求傅氏罪而無所得又百濟國
八姓一曰真近世真氏望出上谷

甄

元和姓纂曰虞帝陶甄河濱因以為氏是也其曰或
音堅則誤矣甄義生于陶甄而不音堅凌義生于凌

人而不音去聲皆後世聲變故與義不協姓氏多如此類皆不足訝政和中御前放進士唱名有甄盎者中書侍郎林攄遽呼為堅快言者劾攄不學以伏獵侍郎比之遂罷攄政事斥散秩甄氏唐方技傳有甄權及其子立言案唐書甄權傳權弟立言此作子悞卓行傳有甄濟及其子逢藝文志有甄鸞注算經

因

左傳遂人四族殺齊戎者一曰因氏

闔

春秋楚大夫闔與罷之後

辛

周武王太史辛甲封于長子後有辛伯辛有皆為大夫有二子適晉史有辛廖其後或為董史至秦將軍辛騰家于中山苦陘曾孫蒲漢初以名家豪俠徙隴西狄道曾孫柔字長泛光祿大夫右扶風都尉馮翊太守四子臨衆武賢登翁武賢破羌將軍後漢有

隴西郡從事辛都又隋辛彥之為禮部尚書文帝令
與沈重論議重不能抗曰辛君所謂金城湯池無可
攻之勢又改姓者後周賜綏化公辛并姓字文宿國
公辛威姓普屯隋初皆復舊賜姓者後周項亶賜姓
辛氏生偃武偃武生義同皆顯于唐為天水辛氏

辰

後魏官氏志代北譬厯辰氏改為辰氏望出河南

仁

五代史甘州回鶻可汗姓仁有仁美及其弟狄銀又有仁裕皆嘗朝貢

人

出姓苑

申

伯夷為堯太嶽之官封其後于申楚文王滅申以為縣其後以國為氏楚大夫申侯是也其族仕諸侯者齊有申蒯又有申鮮虞生傳執魯有申豐申繻申須

申夜姑又申黨字周為孔子弟子漢有魯申培公武
帝東帛加璧召為博士後周賜北海公申徽姓宇文
隋初復舊孫寧任唐燕黃門侍郎申允尚書左丞申
紹北燕有散騎常侍申秀

鄰

漢藝文志道家有老子鄰氏經傳四篇注曰老子姓
李名耳鄰氏傳其學姓書未收此字今增入

鱗

出自子姓宋桓公御寇之後以王父字為氏春秋時
鱗矐為宋司徒鱗朱為少司寇

陳

元和姓纂曰出自媯姓虞帝之後夏禹封舜子商均
于虞城三十二世孫過父為周陶正武王妻以元女
太姬封之宛丘為陳侯以奉舜後是為胡公滿九世
孫厲公他生公子完字敬仲奔齊為工正以國為氏
五世孫陳桓子字無宇孫成子陳常又以所食邑為

田氏今詳左傳魯莊公二十二年陳人殺其太子御
寇陳公子完奔齊其後有桓子無宇生文子須無武
子彊僖子乞乞子占書其諸孫曰成子常及瓘字子
玉逆字子行又陳莊陳豹禮記檀弓有常孫莊子名
伯陳子車子車之弟子亢陳乾昔及其子尊已論語
有陳子禽至太公和遂篡齊國為田齊和孫稱王十
五世孫齊王建為秦所滅三子昇威軫威稱王氏是
為北海陳留諸王之祖軫楚相潁川侯因徙潁川復

為陳氏生嬰秦東陽令史嬰生成安君餘餘生軌軌
生審審生安安生常常生願願生四子清察齊尚齊
生源源三子寔崩遂寔字仲弓後漢太尉掾屬文範
先生六子紀夔洽諶休光諶字季方獻文先生生青
州刺史忠二子佐和佐二子準徽準字道基晉太尉
廣陵公生伯眈建興中渡江居曲阿新豐湖生正二
子赤松世達世達長城令徙居長城下若里生丞相
掾康康生盱眙太守英英生尚書郎公弼公弼生步

兵校尉鼎生散騎侍郎高高生懷安令詠詠生安
成太守猛生太常少卿巨道巨道生文讚三子談
先霸先休先霸先陳武帝也談先梁東宮直閣將軍
義興昭烈公生曇猜曇瑱曇猜陳世祖文帝生鄱
陽王伯山字靖之新安王伯固字宰之廬陵王伯仁
字壽之江夏王伯義字堅之桂陽王伯謀字深之衡
陽王伯信曇瑒陳高宗孝宣皇帝生後主叔寶隋涪
陵太守叔英字子烈遂寧郡守叔堅字子成上黨通

守叔卿字子弼鴻臚少卿叔明字子昭淮南王叔彪
字子華唐宰相叔達字子聰伯山生隋溫令君範淄
州刺史君通唐虔州刺史君賓循吏傳加意勞來以
還流移者伯固生萬州刺史願伯仁生隋資陽令蕃
伯義生隋穀熟令元基文州刺史察忠州刺史憲伯
謀生隋番陽令鄴伯信生梁州刺史法會後主生隋
昌陽令莊字承肅又有潁川陳忠生邕邕生夷行字
道周相唐文宗其弟元錫生夷實夷則夷實生翽夷則

孫喜陵州別駕生陵州刺史聞聞生仲寓及昌誨仲
寓生光豕昌誨生康又宣帝子叔明三孫繹侍御史
宏邢州刺史某晉陵郡司功參軍某生蕙唐右補闕

翰林學士三子當監察御史萇大理評事月

案月字下有闕

有得于陽城者京字慶復祕書監有傳京以從子襲
繼生灌封高安丞灌生伯宣伯黨又唐明皇宰相希
烈汙偽官被誅自有世系漢史曰丞相曲逆侯陳平
陽武戶牖人有兄伯後漢武陵太守陳奉金城太守

陳懿蜀人陳省應募擊羌封侯又武陵澧中蠻陳從
零陵蠻陳湯左傳有樂祁宰陳寅孟子弟子有陳代
陳臻改姓氏者劉聰之臣陳元達字長弘本姓高以
生月妨父改陳氏隋唐間有陳永貴本姓白改焉有
孫令英西魏賜許昌公陳忻姓尉遲隋初復之其曾
孫義感仕唐 唐表陳氏有四誤左傳武王以元女
太姬配胡公而封諸陳是太姬為胡公夫人今以太
姬妻闕父而生胡公一誤也陳佗殺太子免蔡人殺

他而立厲公躍今以厲公名他二誤也史記曰陳嬰
母謂嬰曰自我為汝家婦未常聞見汝先世之有貴
者今暴得大名不祥不如有所屬事猶得封侯今表
云嬰軫之子軫相楚封潁川侯三誤矣史記成安君
陳餘與張耳皆自大梁起兵從劉項取天下嬰自東
陽以兵屬項梁餘嬰二人同時餘居大梁嬰居東陽
本非父子今表云嬰生餘四誤也姓氏之書不可誤
誤則子孫失其祖而後世秉筆者無所據依今改正

其甚者而附以新望云

秦

秦氏出自姬姓周文王世子伯禽父受封為魯侯裔
孫以公族為魯大夫者食邑于秦以邑為氏春秋魯
莊公三十一年書築臺于秦即其地也莊公大夫曰
秦子乾時之戰代君任患而身止于齊其家遂冒
于魯國昭公時有大夫曰商曰遄又有董父者仕孟
氏為孟僖子車右以力聞諸侯商孫西巴

案說苑作秦巴西

有仁心嘗放麋與其母孟孫召為太子傅而託國焉
漢興高祖用婁敬策徙大姓實關中秦氏始自魯徙
居扶風茂陵西漢有襲與羣從同時為二千石者五
人世號萬石秦氏襲孫彭字伯平為後漢循吏有傳
自彭而下顯者代不乏人

蟻

唐咸通中有蟻固知音律

邠

元和姓纂曰周太王居邠支孫氏焉

新

元和姓纂曰出自荀氏新稚穆子之後別為新氏

新垣

陳留風俗傳曰畢公封于垣後以為氏漢望氣者新垣平以詐誅魏將軍新垣行畏魯連之說不敢帝秦

又新垣固請子順相魏

業魏國策及世家俱無此人疑有脫悞

新孫

出姓苑

新和

出姓苑

辛廖

英賢傳晉大夫辛廖之後漢有河間相辛廖通

申公

春秋時楚僭王號其縣尹皆稱公闞克字子儀謂之申公子儀屈巫臣字子靈謂之申公巫臣其後或以

申公為氏風俗通止言巫臣之後又曰漢太子傅申
公誤矣巫臣盡室奔晉申公止姓申氏

申叔

出自楚大夫食邑于申而字叔謂之申公叔侯因為
申叔氏春秋時申叔時勸楚莊王復封陳其子申叔
跪識巫臣竊妻以逃申叔豫以忠言曉遠子馮者皆
賢人又有申叔展其族申叔儀仕吳

申鮮

元和姓纂曰左傳齊有申鮮虞漢有中謁者申鮮洳
謹按鮮虞姓申齊莊公之難奔楚為右尹此必洳之
先因其祖名鮮虞而食邑于申合以為申鮮氏姓纂
蓋援古而未明也

申章

漢儒林傳有長沙王太傅申章昌字曼君楚人傳穀
梁春秋徒衆尤盛

申屠

唐貞觀所定涼州西平郡六姓有申屠氏五代有申屠諤

因孫

出姓苑

真人

唐日本傳建中元年使者真人興能獻方物真人蓋因官而氏者按日本有朝臣真人猶唐之尚書

十八諱

荀

出自姬姓春秋時晉大夫荀息裔孫騶嘉會皆為卿大夫其族為大別為三族一曰晉公族逝敖生林父為文公中行將謂之中行荀氏二曰林父之弟首食邑于知以所食邑氏謂之荀知氏三曰逝敖曾孫歡食邑于程謂之荀程氏漢宣帝名詢當時改荀為孫以避上諱故劉向校荀卿書謂之孫卿子十一代孫遂居潁川復本姓遂生淑字季和有子儉緄靖燾注

爽肅專時人謂之八龍爽生或字文若自有傳

郇

郇侯之後以國為姓後漢荀恁亦作郇唐元載未敗時有男子郇謨以麻總髮哭于市疏其罪惡今淮南有郇氏乃音環未知其所自

淳

姓苑曰吳人

倫

風俗通云黃帝時樂人冷倫氏之後或單為倫氏唐有監察御史元慶京兆人密州多此姓

淳于

故州國一名淳于其地城陽淳于縣是也春秋時杞滅之淳于公如曹子孫以國氏史記有二淳于髡其一齊之贅壻在滑稽傳其一稱先生者在孟子傳唐貞觀所定河內七姓一曰淳于至憲宗避御名改為于氏宋閬州南都淳于氏五代登州刺史晏生尚書

郎希顏

十九臻

莘

武陽莘氏出自妘氏古有莘氏諸侯也女曰修己為
鮌妻生禹其後國已夏后封其少子于莘女為周文
王后謂之太妘其後以國為氏

娶

與莘同或作娶

說

出姓苑

二十文

文

茂陵文固陽本琅琊人善馴野雉為媒用以射雉又
漢初越舊太守文齊不附公孫述以郡歸漢封成義
侯西京雜記大姓文不識家富多書文長倩家一產
二男以前生為長唐開元太學博士文元忠謹按春

秋蔡大夫文之錯越大夫文種宋大夫文無畏字子舟皆屬文王後又衛將軍彌牟謂之文氏之子亦文王後也今兩存之宋文氏其先避翼祖諱折其字為苟文二字此世俗之誤也廟諱于文從苟紀力反從支普木反今以苟為苟且之苟又改支為文訛益甚矣蓋國初儒者少而民未知學故近世避諱更姓者一切謬誤如石城殿氏出于縣令庸人所改尚無足怪至文氏乃巨勲元老之家未嘗自別其誤而處之

不疑尤可惜也

雲

河南雲氏後魏官氏志悉雲氏牒雲氏並改為雲氏
舊唐史教坊副使雲朝霞善笛

妘

國語祝融之後陸終第四子求言為妘姓封于郟其
後別封郟路偃陽凡妘姓四國皆為采衛春秋時郟
子之國亦妘姓

云

妘姓或去女為云

邲

古子爵諸侯國春秋時國小而近楚楚若敖父子娶
焉鬬伯比及令尹子文皆其出也後以國氏

員

音云

世俗讀與韻同蓋訛也前涼錄負懷遠六代孫半千
少從王義方學義方曰吾聞五百歲一賢者生子宜

當因遂命曰半千其先隋末徙居臨汾

君

姓書曰君牙之後謹按君牙君陳皆不著姓而邵公亦曰君奭何獨于君牙之後為氏

軍

謹按安帝時潁川人史玉殺人其母軍請代玉死事見應奉傳則漢有軍氏

芬

戰國策晉大夫有芬質

紛

戰國策魏臣有紛彊則紛乃其氏而姓書未收今增

入


聞人

元和姓纂曰少正卯魯之聞人後以為氏此說未可
據謹按家語弟子質疑者有此言孔子因而數卯之
罪則聞人之說破矣漢后蒼說禮號后氏曲臺禮授

沛聞人通漢子方子方以太子舍人論石渠至中山
都尉

軍車

元和姓纂曰代北複姓



欽定四庫全書

子部

古今姓氏書辨證卷七八

詳校官中書臣沈鳳輝

侍讀臣孫球覆勘

騰錄副貢生臣杭光晉

騰錄監生臣任溥

欽定四庫全書

古今姓氏書辨證卷七

宋

鄧名世

撰

二十一欣

訐

出姓苑

勤

風俗通魯大夫有勤成唐有館陶尉勤曾

勤宿

後魏末有賊帥勤宿明達

二十二元

元

前漢郊祀志秦始皇時有燕人尚能為仙方 河南

元氏出自拓拔魏孝文太和二十年詔曰北人謂土

為拓后為拔魏之先出於黃帝以土德王故為拓拔

氏夫土者黃中之生萬物之元也宜改姓元氏都洛

陽十一世一十五帝一百六十一年為後周北齊所

滅初什翼捷七子一曰寶君二曰翰三曰闕婆四曰

壽鳩五曰紇根六曰力真七曰窟咄道武皇帝窟咄

子也

案魏本紀及唐世系表道武帝俱作寶君子此作窟咄子

生明元皇帝嗣嗣生

太武皇帝燾燾生景穆皇帝晃景穆諸子濬新成子

推天錫雲楨胡兒休八房子孫聞於唐濬文成皇帝

也文成諸子弘長樂二房子孫聞於唐弘獻文皇帝

也獻文諸子宏幹羽颺四房宏孝文皇帝也子七人

恂恪懷愉懌悅恪宣武皇帝也懷廣平文穆王生文

懿王悌悌生驃騎將軍侍中贊贊生後周韓國公謙

謙生菩提菩提生寶琳寶琳五世

案唐世系表五世孫應作六世方合

世孫文贄皆襲爵而什翼捷第六子力真力真二子

意烈意勁意勁彭城公五世孫敷州刺史楨生巖成巖

字君山隋平昌公生琳弘弘隋北平太守生義端唐魏

州刺史義端生延壽延福延景延景岐州叅軍生南頓

丞悱悱生比部郎中寬寬生穆宗宰相稹字微之以

詩名天下謂之元才子稹生道護 永州元氏結字

次山水部員外郎老於文學居永州祁陽縣自名其溪曰浯溪山曰岵山臺曰唐臺字皆從吾吾者我也作大唐中興頌磨崖刻石焉至今溪上居民釣魚鬻碑者數十室皆其遠孫桑梓猶在 宋朝杭州錢塘元氏出自五代信州刺史仔昌撫州節度使危全諷之弟也與楊渥戰敗失郡奔吳越錢武穆王惡其姓改曰元氏

素

出自媯姓陳胡公滿生申公犀侯犀侯生靖伯庚庚
生季子惓惓生仲牛甫甫生聖伯順順生伯他父他
父生戴伯戴伯生鄭叔鄭叔生鄭仲金父金父生莊
伯莊伯生諸字伯爰孫濤塗從齊桓公盟會賜邑陽
夏以王父字為爰氏爰棘一也濤塗字仲謚宣謂之
棘宣仲生選選生聲子突突生惠子雅雅生頗為司
徒奔鄭秦末裔孫告避難居於河洛之間少子政以
素為氏九世孫素生玄孫幹封貴鄉侯復居陳郡陽

夏八世孫良二子昌璋昌成武令生漢司徒安字邵
公三子賞京敞京蜀郡太守二子彭湯湯字仲河太
尉安國康侯三子成逢隗成左中郎生紹紹中子熙
其後居樂陵東光熙裔孫令喜同州治中生異弘異
度異式異弘唐瀘州叅軍生恕已相唐中宗恕已生
淮陽太守建康建康生給事中高嘗封駁盧杞復官制書
知名璋生漢司徒滂字公熙滂生渙字曜卿魏御史
大夫四子罕

崇唐世系
表罕作侃

遇興準準字孝尼晉給事中

生冲字景玄光祿卿生耽字彥通歷陽太守耽生質
字道和東陽太守二子湛豹豹字士蔚丹陽尹二子
洵淑淑宋吳郡太守謚曰正二子顓覲顓字國章宋
雍州都督二子戩昂昂字千里梁司空穆正公三子
君正敬泌君正字世忠吳郡太守生憲穎穎後周驃
騎大將軍穎生子溫字君恪隋左衛大將軍溫生士政
南州刺史士政生當陽令倫倫生石州司馬知玄知
玄生咸寧令暄暄生滋字德深相唐憲宗五子垆寔

均都郊敬泌二房世系具唐表 河東袁氏本出陳
郡智弘相唐高宗其孫幹御史中丞元和姓纂曰望
出陳郡陽夏者自後漢魏晉至梁陳正傳二十八人
三公令僕一十七人望出汝南者安後出彭城者生
後出京兆及華陰者皆渙後出襄陽者術後謹按左
傳宣仲之後陳大夫有袁僑及袁克

原

春秋時鄭有原繁陳之原氏所謂南方之原者後世

望出魯郡者孔子弟子原亢字籍出南郡者趙廣漢
傳有潁川大姓原褚宗族恣橫後漢漢中太守鄭勤
門下吏原展以身扞勤為羌所殺

爰

漢末盜後有爰猛者其大父為廣川王中尉諫王發
冢為盜後漢爰曾字子路起兵盧城頭時號城頭子
路後趙有鄂人爰赤眉妻李子揚以女與共為妖亂
唐有郃國公爰子幹

垣

謹按後漢公孫述傳南陽人宗成起兵為其將垣副
所殺注風俗通曰垣秦邑也因以為姓是也晉宋而
下垣猶屬畧陽郡南史垣護之畧陽垣道人是也始
皇將垣騎之後晉有弘農太守垣延襲破劉聰軍宋
臨淮太守益陽壯侯垣護之字彥宗其弟積射將軍
詢之護之子襲祖淮陽太守詢之子崇祖字敬遠齊
五兵尚書驍騎將軍南齊驍騎將軍乃榮祖之從弟

也

轅

漢功臣表有轅買陳大夫

案陳大夫有轅諸生濤塗出自陳胡公七代孫其後

去車為袁此脫
又轅或作棟

棟

或作轅漢樓船將軍棟終古斬狗北將軍封語兒侯

案漢書作
節兒侯

師古曰棟音袁人姓也

樊

出自姬姓謹按周成王分魯公伯禽以商民七族一
曰樊氏

言

仲尼弟子言偃字子游吳人莊子有言成子游偃生

言思女嫁子張之子申祥

案孟子作申詳

軒轅

黃帝之後以號為姓唐韓愈集道士軒轅彌明作石

鼎聯句詩一坐驚伏宋光州固始令軒轅節

軒丘

出自芊姓楚文王子食采軒丘因以為氏漢有梁相
軒丘豹

原伯

英賢傳曰左傳周原伯絞之後氏焉晉孝公時有大
夫原伯蓋謹按春秋原伯貫在絞之前百年雖曰貫
之後為氏可也絞即虐其輿臣使曹逃者

原仲

元和姓纂曰陳大夫原仲後楚大夫有原仲茂

二十三魂

渾

出自姬姓周宣王母弟鄭桓公友友孫穆公之子偃
字子游其孫為游氏游氏之孫罕子寬又別為渾氏
河南渾氏出自匈奴渾邪王隨拓拔氏徙河南因
以為氏隋唐間以氏為部而屬回鶻存九姓諸部中
族帳最南貞觀時薛延陀滅大俟利發渾汪舉部內

向以其地為臯蘭都督府其酋阿貪支者名潭隋王
鈐衛大將軍生回貴唐豹韜衛大將軍靈丘縣伯生
元慶元慶生大德太壽太壽太僕丞生釋之字釋之
左武衛大將軍寧朔郡王生瑊相德宗位太師為建
中功臣自瑊以上世襲臯蘭都督謹接近世讀史者
皆以瑊姓音混然未有明據也

昆

出自己姓昆吾之後單姓昆

溫

謹按春秋周武王克商蘇忿生以溫為司寇其裔孫蘇子叛王即狄遂失國及晉文公納襄王王賜之溫晉大夫狐溱陽處父卻至皆食其地陽卻無後惟狐氏子孫因以為姓狐本姬姓其先出自虞叔所謂公族者也漢有椹順侯溫疥生仁仁子何始居太原祁縣何六代孫序字次房後漢護羌校尉二子壽益壽鄒平侯相益字伯起兖州刺史生恕恕生恢魏揚州

刺史生濟南太守恭恭二子羨憺憺晉河東太守生
嶠字太真江州刺史始安忠武公人謂之玉鏡臺藝
犀照江而死者嶠兄六人並知名時號溫氏六龍從
子楷隨亘謚奔後魏玄孫馮翊太守奇曾孫裕太中
大夫生隋泗州司馬君攸君攸生大雅彥博彥將大
雅字彥弘唐禮部尚書黎孝公生工部侍郎無隱坊
州刺史釋胤彥博字大臨相太宗尚書右僕射虔恭
公生太子舍人振延州刺史駙馬都尉挺彥將字大

有中書侍郎清源恭公生瓚瑜瑾瑜釋胤孫景倩南
鄭令生太常丞佶字輔國佶生邈造遜造字簡輿河陽
節度使禮部尚書祁縣子生璋京兆尹檢校吏部尚
書振曾孫曦太僕卿及其子祕書監西華皆駙馬都
尉裔孫庭筠本名岐字飛卿工辭章與李商隱齊名
號溫李時宰斥其擾場屋不得第子憲光啟中及第
為山南從事李巨川嘗表雪庭筠曰蛾眉先妬明妃
為去國之人猿臂自傷李廣乃不侯之將人至今傳

誦之庭筠弟廷皓拒龐勛不為草表被害贈兵部郎
中唐武德中溫彥博兄弟相代為中書侍郎時稱溫
家二彥唐史曰初顏氏溫氏在隋最盛思魯與大雅
俱事東宮愍楚彥博同直內省游秦大有典校祕閣
顏以學業優溫以職位顯於唐初大雅遷黃門彥博
在中書皆為侍郎對筦華近高祖嘗從容謂曰我起
晉陽為卿一門耳 河南溫氏後魏官氏志代北溫

盆氏改焉

案後魏溫盆氏及溫
狐氏俱改為溫氏

門

唐京兆尹呂元膺擒山棚賊門察

案門氏王應麟謂出自周禮公卿之

子入王端門之左教以六藝謂之門子其後氏焉莊子有門無鬼又魏書官氏志庫門氏叱門氏吐門氏

後俱改為門氏

孫

出自姬姓衛康叔八世孫武公和生公子惠孫惠孫
生耳為衛上卿食采於戚生武仲乙以王父字為氏
乙生昭子炎炎生莊子紇紇生宣子鱣鱣生桓子良

夫良夫生文子林父林父生蒯襄子嘉嘉字伯國世居汲郡漢武帝時會稽人孫辛為朱崖太守後漢建武中郎將孫永擊蠻又有隴西太守孫純孫羗晉有孫登又出自媯姓齊田完字敬仲四世孫無字二子常書書字子占齊大夫伐莒有功景公賜姓孫氏食采於樂安生憑字起宗齊卿憑生武字長卿以田鮑四族謀作亂奔吳為將軍三子馳明敵明食采於富春自是世為富春人明生顓顓生勝字國輔秦將勝

生蓋字光道漢中守生知字萬方封武信君知生念
字湛然二子豐益益字立器生卿字伯高漢侍中生

憑字景純車騎將軍二子屆詢詢字會宗

按唐世系表會宗作

會定安定太守二子鸞騏鸞生爰居爰居生福為太原

太守遇赤眉之難遂居太原太原之族有嵐州刺史
昉生存進安定太守詢次子騏字士龍安邑令二子

通復通子孫世居清河

按唐世系表通子孫世居清河後魏有清河太守靈懷此

清河下脫後魏有清河五字

太守靈懷武德中子孫因官徙汝州

邳城靈懷曾孫茂道初名處約字歷道相唐高宗五
子佺侑俊傲佺安邑令騏少子夔字子遠後漢天水
太守徙居青州生厚字重殷大將軍掾生瑤字良玉
中郎將生邃字伯淵清河太守生儵字士彥洛陽令
生國字明元尚書郎生耽字玄志漢陽太守二子鍾
旃鍾吳先主權之祖也旃字子之太原太守二子炎
歷炎字叔然魏祕書監生稜字仲觚太官令生道恭
字雅遜晉長秋卿二子顓芳顓字士若芳中書令子

烈避趙王倫之難徙居昌黎生岳前燕侍中子孫稱
昌黎孫氏歷幽州刺史右將軍生旂字伯旗平南將
軍坐與孫秀合謀夷三族顛避地河朔居武邑遂生
輝後趙射聲校尉生緯幽州都督生周後燕高陽王
文學生恭仁北燕司隸功曹二子苑蔚蔚字伯華後魏
秘書監棗彊戴男二子伯禮方嗣伯禮巴州刺史襲
棗彊戴男三子元琥孝敏廣烈元琥北齊文宣皇帝
相國騎曹生北齊治中大將軍司馬靈暉生萬安萬

壽萬安隋徐婺充三州刺史四世孫迪樂陵王簿孝
敏隋晉陽令生壽張丞仲將仲將生韓王典籤希莊
希莊生宋州司馬嘉之嘉之生逖唐刑部侍郎左庶
子文公逖生華州刺史宿宿生公器邕府經畧兼御
史中丞六子華清正簡範褱晏華清太原尉正河中
少尹簡東都留守太子太保逖三弟適羽林兵曹參
軍邁亳州刺史造詹事司直邁四子公彥睦州刺史
客卿盱眙令公輔陸渾丞起白馬令起三子非熊黃

梅尉景商天平軍節度使檢校禮部尚書謚康清太
原少尹景商九子備字禮用直弘文館藍田尉儲字
文府京兆尹樂安侯伍興元少尹儉字德府昭義判
官偃字龍光相昭宗僉春秋博士佾字文節集賢院
學士司勳郎中方嗣後魏建威將軍生仲瑜隋吏部
侍郎二子恭文石邑令孝哲會稽令孝哲五世孫諫
唐右武衛兵曹叅軍又前漢夏侯嬰傳曰初嬰為滕
令奉車故號滕公及曾孫頗尚主隨外家姓號孫公

主故滕公子孫更為孫氏今詳此即漢公主母氏姓
孫而夏侯氏有冒姓孫氏者又唐宰相表云孫氏一
出楚蚡冒生王子為章字無鈞生為叔伯呂臣孫為
賈伯嬴生為艾獵即令尹孫叔敖亦為孫氏誤矣謹
按為教字孫叔一名艾獵古人先字後名故謂之孫
叔敖傳曰為教為宰擇楚國之令典是稱其姓名伍
參曰若事之集孫叔為無謀矣是稱其字也今駁正
之明其未嘗為孫氏

敦

晉張方有將敦偉夜擊破劉沈軍

倕

纂文要曰音盆

盆

風俗通曰盆成括仕齊見殺其子逃難去成為盆氏
漢有中郎將盆謚

賁

音奔

元和姓纂曰魯縣賁父之後晉有賁浦漢有郎中賁
光晉又有汝南賁嵩清操之士又庾琛女適汝南賁
氏又有長水校尉賁顯謹按後漢董憲將賁休舉蘭
陵城降注前書有賁赫音肥今有此姓賁音奔是隋
唐以來音變而有此氏

孫陽

英賢傳曰秦穆公子孫陽伯樂善相馬其後氏焉漢
侍御史孫陽放即其後

昆吾

出自己姓高陽氏孫陸終生樊封於昆吾夏時昆吾為伯因以國氏

屯渾

元和姓纂曰太昊之佐屯渾氏其後為氏

溫稽

出後魏書

奔水

神農娶奔水氏女為妃

二十四痕

恩

風俗通曰陳大夫成仲不恩之後為氏後燕有東庠
祭酒恩茂

根牟

出自東夷根牟小國在琅琊陽都縣東之牟鄉春秋
魯宣公九年取其國子孫氏焉六國時有根牟子著

書見風俗通

根水

世本老童娶根水氏女

欽定四庫全書

卷七

欽定四庫全書

古今姓氏書辨證卷八

宋 鄧名世 撰

二十五寒

寒

姓書曰韓寒聲變因有寒氏考其實不然謹按春秋夏諸侯伯明氏之君曰后寒生子浞善讒后寒惡而棄之有窮后羿收浞而信使之以為己相因以父字為氏謂之寒浞殺羿而因其室生澆及豷則夏之中

葉亦有寒氏成王封武王子於韓猶在數百年後則非聲變可知也前漢游俠傳有陝人寒孺卽后寒之裔也又後漢寒朗字伯奇一云朗姓寒非寒氏

單

河南單氏後魏官氏志代北褐單氏可單氏並改為

單氏

宋魏志褐作渴可作阿

韓

姓書校證最號詳備者如元和姓纂唐宰相世系表

皆云晉曲沃成師生萬食采韓原因以為氏盖用杜
元凱左傳注也謹按周武王庶子封為韓侯幽平之
後國滅而地入于晉則萬宜出韓侯未必成師之子
故顏師古註漢書曰邗晉應韓武之穆也據如韓王
信贊所云則韓萬先祖武王之裔而杜預以為出自
曲沃成師未詳其說師古此注最為有理今宜用其
意更之曰韓氏出自姬姓周武王庶子封為韓侯奄
受追貊之戎以長北諸侯其地謂之韓城春秋時晉

韓原是也宣王中興韓侯能幹不庭方以佐王大有
功於周室王親命之賜之梁山以為韓國之望平王
東遷子孫失國以國為氏而地入于晉至曲沃武公
并晉有韓萬者為戎御大夫伐翼有功復封韓原以
為采地自是韓氏始昌阜於晉萬字武子生定伯簡
字子豐子豐生子輿子輿生獻子韓厥厥生穆子無
忌及宣子起起代厥為正卿起生叔禽叔椒子羽須
無須無代起為卿謂之平子生簡子不信字伯音其

族人有褐穿固箕襄邢帶及景子襄皆為晉大夫景
子無忌字不信生莊子莊子生康子始與趙魏分知
伯之地康子生武子武子生景侯虔始與趙魏俱列
為諸侯景侯生烈侯烈侯生文侯文侯生哀侯哀侯
生懿侯懿侯生昭侯昭侯生宣惠王宣惠王生襄王
倉倉生太子嬰公子咎公子蟣蝨咎立為釐王釐王
生烈惠王烈惠王生王安為秦所滅而蟣蝨生信漢
封為韓王後與太子俱亡入匈奴至頽當城生子因

名為頽當韓太子亦生子嬰至孝文時頽當及嬰率其衆降漢封頽當為弓高侯嬰為襄城侯弓高侯傳子至孫國絕其孽孫媽貴幸媽弟說擊匈奴封龍額侯子增嗣謚安侯生嗣侯寶及河南尹騫寶無子國除成帝封增兄子岑為龍額侯子傳弓嗣而騫避王莽亂徙居赭陽九世孫術生純皆河東太守純生魏司徒甫陽

案唐世系表甫陽作甫卿

恭侯暨六世孫延之字顯宗後

魏魯陽侯孫瓌平涼太守安定公生常州刺史演演

生褒字弘業後周少保三水正伯生唐戶部尚書仲
良仲良生瑗字伯玉相高宗武安韓氏弓高侯頽當
裔孫尋後漢隴西太守世居潁川生司空稜字伯師
其後徙居安定武安後魏有常山太守武安成侯耆
字黃耆徙居九門生茂字元興尚書令征南大將軍
安定王二子備均均字天德定州刺史安定康公生
暉雅州都督生曹州司馬仁泰仁泰生叡素桂州長
史七子晉卿同州司法參軍季卿義王府曹曹參軍

子卿陝州功曹參軍仲卿秘書郎雲卿禮部郎中紳卿京兆府司錄升卿易州司法參軍仲卿生愈字退之唐大儒也吏部侍郎謚文公宋封昌黎伯從祀文宣王廟昌黎韓氏河東太守純四世孫安之晉員外郎二子潛恬恬二子都偃偃臨江令生後魏從事中郎穎穎生播字遠遊徙昌黎棘城二子勵紹紹字延宗揚州別駕二子奕胄胄字弘胤北齊膠州刺史生護字靈祐後周商州刺史護生賢字思齊隋郃州刺

史

案唐世系表
邠州作鄆州

葉黃臺公賢生符字節信唐巫州刺

史符三子大壽大智大敏大智字不惑洛州司戶參

軍生偲秘書郎休字良士相明皇以骨鯁知名善諫

諍九子浩高陵尉洽

案唐世系
表洽作治

監察御史洪邢州長

史澣郊社丞法諫議大夫澁字太沖相德宗中書令

晉國公生羣臯羣禮部員外郎臯字仲聞尚書左僕

射陽夏韓氏南鄉恭侯暨之後徙陽夏望生垂垂生

弘充弘相唐憲宗子公武字從偃右驍衛上將軍檢

校司徒宣武節度使謚曰肅

案唐世系表宣武節度使謚肅者乃弘弟充此

檢校上似
脱充字

丹

元和姓纂曰堯子丹朱之後為氏漢有長安富人丹

玉君

安

出自姬姓黃帝生昌意昌意次子安居于西方自號
安息國後漢末遣世子高入朝因居洛陽晉魏間家

于安定後徙遼東姑臧以避亂又徙武威 河南安
氏後魏代北安遲氏改焉又安祿山本姓康其母阿
史德為覲居突厥中禱於軋牢山即俗所謂戰鬥神
者既而妊及生有光照穹廬野獸盡鳴望氣者言其
祥范陽節度使張仁愿遣搜廬帳欲盡殺之匿而免
母以神所命遂字曰軋牢山少孤隨母嫁狄將安延
偃開元初延偃携以歸國與將軍安道買皆來得依
其家乃冒姓安更名祿山其後賊平肅宗以國賊讎

惡惡聞其姓京師坊里有安字者悉易之

難

姓苑云百濟人姓

但

音
賈

漢王莽傳西域焉耆先叛殺都尉但欽又姓苑有濟
陰太守但巴近有黃州進士但氏自云其姓讀如去
聲又音訛為淡

邗

河南邗氏後魏官氏志邗氏改焉

蘭

舊云出自姬姓鄭穆公方娠其母夢天使與之蘭既
生名之曰蘭及有疾刈蘭而卒子孫神之因以為氏
楚漢之前既無此氏即合止以漢史為始

案漢書有武陵太守蘭廣

刊

出姓苑

韓餘

世本韓宣子餘子之後氏焉謹按春秋晉成公宦卿之餘子以為餘子蓋適子之母弟宣子韓起也

韓侯

元和姓纂曰周宣王錫命韓侯支孫氏焉

韓褐

英賢傳曰韓厥後趙肅侯大夫有韓褐胥居

邯鄲

會稽典錄度尚弟子邯鄲淳字子禮弱冠有異才作

曹娥碑無所點定蔡邕題八字曰黃絹幼婦外孫董
白

安丘

耿弇父况與王莽從弟伋共學老子於安丘先生嵇
康聖賢高士傳曰安丘望之字仲都京兆長陵人少
持老子經恬靜不求仕宦號安丘丈人成帝聞欲見
望之望之辭不肯見為巫醫隱於人間也

安國

漢南越王趙嬰齊娶膠氏女為后后常與霸陵人安國少季通及太子興立後為太后武帝元鼎四年使安國少季使南越諭王及太后入朝師古曰姓安國字少季

安陵

戰國策安陵纏楚王妃之父安陵小侯國也子孫氏焉

安是

英賢傳曰晉有安是叔施事晉厲公

安都

晉傳餘顏複姓錄有此氏

安遲

後魏安遲氏改為安氏

蘭喬

元經傳曰匈奴四姓有蘭喬氏號曰逐世為輔相

二十六桓

桓

孝慈淵聖皇帝御名胡官切從木從亘出自姜姓齊
公小白之後以謚為氏東觀記曰齊侯作伯支庶用
其謚立族命氏焉紹興二年詔避諱之字曰亘音周
旋之旋後漢太子太傅榮字春卿其先齊人自齊徙
沛國龍亢榮生雍郁郁字仲恩襲爵關內侯生普延
俊豐良普傳爵至曾孫延字叔元太尉陽平侯生衡
順順生典字公雅光祿勳關內侯良龍舒侯相生鸞

字始春議郎子暉字文林又族人鄴生麟麟生彬字
彥林尚書郎榮八代孫夔晉宣城內史生雲溫諮秘
沖沖荊州刺史豐城公生嗣謙修修晉護軍長社侯
過江居丹陽生尹尹生崇之崇之七世孫法嗣唐郇
王府諮議參軍生少府丞思敏思敏生彥範相唐中
宗姓書或云宋公禦說之後司馬魁亦為此姓誤矣
魁乃向氏特宋之公族謹按左氏齊車右大夫桓跳
即榮之先

官

出姓苑

觀

出自妣姓夏王啟庶子五人食邑於觀謂之五觀其地洛汭是也五觀之後為諸侯有罪夏王滅之子孫以國為氏觀丁父仕都楚武王伐都俘丁父以歸使為軍帥故楚大夫獨有觀氏而世掌太卜謂之卜尹觀起觀從觀瞻皆其後也後漢中平四年有零陵人

觀鵠自稱天平將軍

藥

出自姬姓唐叔虞之後靖侯孫賓食邑於藥因以為
氏其地趙國平棘縣西北藥城是也賓生共叔共叔
生貞子枝枝生宣子盾盾生武子書書生桓子廩廩
生懷子盈皆晉卿盈弟京廬及鍼糾樂魴弗忌豹六
人皆為大夫漢有尚書藥巴魏郡內黃人又春秋時
齊惠公子雅生施字子旗亦為藥氏

謹

出姓苑

敬

一作鄴
則官反

海西先賢傳有漁陽人敬援字仲弓

瞞

風俗通荆蠻之後本姓蠻後世音訛遂為瞞氏或曰
本姓盤改焉左傳衛有司徒瞞成

潘

出自姬姓豫章潘氏南唐散騎常侍處常生內史舍
人佑今為大族又潘一作番漢食貨志河東守番係
省砥柱之漕師古注曰番音普安切

草

姓苑音潘謹按草棄糞器也

冠

列仙傳有仙人冠先

完顏

完顏昌仕金為大興尹有文器材宣宗面勞之曰卿
曾大父是開國元勳

二十七刪

關

風俗通云關令尹喜之後誤矣喜為周函谷關尹蓋
三代官名國語言敵國賓至關尹以告是也漢藝文
志有關尹子師古曰名喜為關吏老子過關喜去吏
而從之

環

謹按周禮夏秋官皆有環人未必其後不為氏姓纂
獨取環烈之後必有所據也

班

出自芊姓楚若敖之後秦滅楚鬪班裔孫遷晉代之
間因為班氏

蠻

出自芊姓荆蠻之後春秋謂之戎蠻子亦曰蠻子赤

其後為氏

顏

元和姓纂曰圈稱陳留風俗傳葛洪要纂皆曰出自
顓帝之後陸終第五子安為曹姓周武王封其裔孫

曹挾於邾至邾武公字伯顏人謂顏公子孫因以為

氏王儉譜云

案通志引王儉譜云顏氏出自魯侯伯禽走庶食采顏邑因氏焉今王儉譜云

之下不載儉語謹補之

未知儉何所據今因圈葛二家舊譜為

定謹按顏邑不見於經傳而邾婁顏公事見公羊傳

魯公自為家譜亦以邾言其近也邾近而人多事魯
故魯大夫有顏莊叔及鳴高齊亦近邾國其大夫有
顏庚字涿聚及其子晉

關龍

元和姓纂曰夏桀時關龍逢之後誤矣龍逢姓關莊
子言龍逢剖即其名也後無複姓

馯臂

商瞿傳瞿傳易於馯臂子弓徐廣曰子弓楚人馯臂

氏也

二十八山

山

風俗通云晉有山祈為七輿大夫賈執姓氏譜河內
五姓其一山氏

間

解見簡氏

簡

音間

漢淮南厲王傳曰王與故中尉藺忌謀殺反者開章以閉口師古曰姓藺名忌藺音奸嚴助作間字音同今流俗本此藺字或作簡者非也蓋後人所改然則藺間其本一也

間

音問

史記濟南間氏宗人三百餘家豪猾二千石不能制
景帝使郅都盡誅之

欽定四庫全書